

AZAROAK 25, EMAKUMEEN KONTRAKO INDARKERIA EZABATZEKO

NAZIOARTEKO EGUNA

ADIERAZPEN INSTITUZIONALA

Azaroaren 25a, emakumeen kontra burutzen den indarkeria mota oro, guztiz onartezina dela esateko eguna da; gainera, indarkeria sortzen duten eragile eta egitura guztiak ukatzen ditugula esateko eguna da, eta gure herrian ez dugula ez bakerik ez normalizaziorik izango emakume izate hutsagatik emakumeak hiltzen eta erasotzen jarraitzen den bitartean aldarrikatzeko eguna. Horregatik, egun honetan erakunde publikoak, borroka horretan dugun lehentasunezko eragile-izaera berretsiz, konpromiso zehatzak hartu behar ditugu.

Euskal Herrian, urtea hasi denetik 8 emakume erail dituzte. Hala ere, ezin dugu ahaztu indarkeria honen adierazpen gehienek, egunero gertatzen direnak, normalizatuak eta inbisibilizatuak jarraitzen dutela.

Hedabideak, publizitatea, telebista, hezkuntza eredua, emakumeen errepresentazio falta, emakumeak menderatzen dituzten genero estereotipo eta rola, sinesmenak, praktikak eta jarrerak, besteak beste, injustua eta emakumeak gutxiesten dituen orden sozialaren parte dira. Orden hori soziala, ekonomikoa eta sinbolikoa da, bizitzaren arlo guztiak blaitzen ditu, publikoak nahiz pribatuak, eta, emakumeak genero mandatu patriarkalean izateko asmoz, indarkeria matxistaren adierazpen guztiak erabiltzen ditu.

Zeharkako esku hartze integralak eta iraunkorrak abian jarri behar ditugu: berbiktimizazioa baztertuta, emakumeak subjektu aktibo gisa hartuko dituzten esku hartzeak; errudun bilakatuko ez dituen esku hartzeak eta, ahots propioa, eragile aktibo diren neurrian, aitortuko dizkieten esku hartzeak. Horretaz gain, bermatu behar ditugu genero ikuspegi ahalduntzailea barnebiltzen duen artatze sistema eta erreparazio prozesuak, bai banakoak, bai kolektiboak.

Eta zeregin hori, gure egin behar dugun konpromiso hori, gizartea osatzen dugun eragile guztiok gure egin behar dugu, hala egiten ez badugu, indarkeria matxistari eusten jarraituko dugulako. Denon erantzukizuna delako bakoitzaren eragin-eremutik aurre egitea sortzen edo babesten ari den indarkeria matxista amaitzeko: erakunde publikoak, kultur-eragileak, hedabideak, lan-arloko eragileak eta eragile ekonomikoak. Baina pertsonak, familiek, adiskideek, kolektiboek eta arduradun publikoak ere zuzeneko erantzukizuna dugu.

Horregatik, indarkeria matxistaren aurkako nazioarteko egun honetan, sendo adierazi nahi dugu Euskal Herria feminista, justu eta ekitatezko baten aldeko aldarrikapena. Bat egiten dugu mugimendu feministak antolatutako mobilizazio eta ekintzekin, eta herritar guztiei dei egiten

diegu horietan, zein udaletik antolatutako jardueretan parte hartzeko. Horrez gain, honako konpromiso hauek gure gain hartzen ditugu:

1.- Oñatiko Udalak indarkeria matxista jasan duten emakumeen arretarako udal barruko eta instituzioen arteko koordinazio protokoloa jarriko du martxan. Baita erantzun instituzionala emateko protokoloa ere.

2.- Udal honetan, izateko eta izendatzeko modua orekatzeko xedez, aurrerantzean “indarkeria matxista” adiera erabiliko dugu, adituek hori erabiltzen baitute modu normalizatuan.

3.- Oñatiko Udalak, 2019ko aurrekontuak definitzeko unean, berdintasun-unitateari beharrezko baliabide tekniko eta ekonomikoak emango dizkie, eta unitate horiek egonkortu eta indartzeko konpromisoa hartzen du.

4.- Oñatiko Udalak hezkuntzako agenteei zuzeneko deia egiten die curriculum-lerroetan genero-berdintasuna eta feminismoa zeharka sar ditzaten.

5.- Oñatiko Udalak herritarrentzako, eta bereziki emakumeentzako, dauden baliabideen gaineko informazioa eskuratzeko bideak erraztuko ditu.

6.- Oñatiko Udalak, neskei, gazteei eta emakume helduei zuzendutako jabeakuntza jarduerak abian jartzeko asmoz, prozesu iraunkorrak bermatuko ditu.

7.- Oñatiko Udalak, nerabeei eta gazteei zuzendutako formakuntza eta hezkuntza espazioak eta prozesuak abiatuko ditu.

8.- Oñatiko Udalak, mutik eta gizonei zuzendutako lanketa berezituak abiatzeko konpromisoa hartzen du.

9.- Oñatiko Udalak, emakumeei zuzendutako autodefentsa feministako tailer iraunkorrak abiatuko ditu.

10.- Oñatiko Udalak, indarkeria matxista jasan duten emakumeen erreparazio eta aitortza banakakoa nahiz kolektiboa lantzeko programa iraunkorrak martxan jarriko ditu, besteren artean memoria historikoa berreskuratzea, omenaldiak, jardunaldiak, tailerrak, ikerketak, zineforumak, bisibilizazio ekimenak (kaleen izenak, kasu)... jasoz.

11.- Oñatiko Udaletik, borroka feministaren alde hartu dugun konpromisoa berretsi nahi dugu, indarkeriarik gabeko gizarte demokratiko bat eraikitzeko bide eta tresna nagusia den heinean.